

中国边疆研究资料文库·边疆行政建制初编

西北及西南

中国边疆研究资料文库·边疆行政建制初编

西北及西南

讀史方輿紀要卷一百十二

廣西七 外國附考

安南，在憑祥州南七百五十里。東至海三百二十里，南至占城國界一千九百里，西至雲南老撾宣慰司界五百六十里，自其國都至京師一萬一千一百六十五里，至廣西布政司二千八百里。古南交地，虞書「宅南交」是也。周曰交趾。禮王制：「南方曰蠻，離題、交趾。」秦爲象郡地，秦末屬於南越。史記：「尉佗以兵役屬西甌，（一）略。」安南即所謂略越也。漢元鼎五年平南越，置交趾、九真、日南等郡，兼置交州刺史。後漢建武十六年交趾女子徵側、徵貳反，馬援討平之。孫吳時增置新昌、武平、九德三郡，晉因之。宋增置宋平、宋壽等郡，齊增置義昌郡，梁於交趾等郡增置交、愛、驩等州，兼置交州都督府。隋平陳廢郡存州，改都督府曰總管府。煬帝初州廢，仍爲交趾、日南、九真等郡。唐武德三年仍置交州總管府，管交、峰、愛、仙、肅、宋、慈、澄、道、龍十州。（二）七年改曰都督府。其後諸州增省不一。調露元年又改都督府曰安南都護府，至德二年曰鎮南都護府，大曆三年仍曰安南，以刺史充都督。貞元六年置軍曰柔遠軍。咸通初爲南詔所陷，明年收復。四年復爲南詔所陷，七年高駢攻克之，始置靜海軍於安南。天祐初曲承裕據其地，再傳至曲承美。五代唐長興初南漢劉龔遣軍攻拔交州，執承美以歸，以其將李進守之。明年愛州將楊廷藝攻取交州。晉天福二年，交州將皎公羨殺廷藝而代之。三年廷藝故將吳權舉兵攻殺公羨，遂據

交州，稱靜海節度使。權卒，子昌岌立。卒，子昌文立。周顯德初始請命於南漢，南漢以昌文爲靜海軍節度使，兼安南都護。宋初復爲部人丁部領所據，自稱萬勝王，以子璉爲靜海節度使。開寶六年內附，八年封交趾郡王，自是交趾遂爲異域。璉死，弟璿嗣，又爲其將黎桓所篡，景德初封南平王。桓死，子龍挺嗣。景德四年改封交趾郡王。死，子至忠嗣。大中祥符三年爲其臣閩人李公蘊所篡，宋仍封爲交趾郡王。再傳至日尊稱帝國，號大越。熙寧間王安石議開邊，侵擾蠻境。八年交人叛，陷欽、廉、邕等州。九年詔郭逵等討之，至富良江，得四州一縣而還。其地尋復入於交趾。公蘊八傳嗣絕，爲其婿陳日昃所有。宋淳祐十二年蒙古將兀良合台破安南，日昃遁海島。師還，日昃復取其地。宋亡，日昃子光昃歸附，元封爲安南國王。光昃死，子日桓自立，不受命。再發兵擊之，皆不能克。日桓死，子日煒嗣，復遣使入貢。日煒死，子日燿嗣，明朝洪武二年率先入貢，遣使冊爲安南國王。未至，日燿死，姪日燿嗣。五年爲陳叔明所篡，叔明老弟熾代視事。十一年熾攻占城敗死，弟煒代立。二十一年其相黎季犛弑煒立叔明子日焜。明年又弑日焜，立其幼子顯，假煒名來貢。二十九年思明府奏：「安南奪丘溫、如盤、慶遠、淵、脫五縣。」遣使勅以地還思明。不聽。三十二年季犛復弑顯而立其幼子竇。尋復弑竇，奪其位。季犛諱姓名曰胡一元，子蒼曰奎，僭號紀元，國號大虞。永樂元年表稱陳氏嗣絕，請署國事，從之。已復封爲王。二年陳氏故臣裴伯耆走闕下乞師，而老嫗亦傳送故王孫陳天平來朝，詔詰季犛。季犛詭請迎天平歸國，詔廣西都督黃中、呂毅率兵五千送天平歸國。至境，季犛僞遣使迎候，而伏兵隘口，襲殺天平及大理卿薛岳等。中等引還，於是以成國公朱能爲征夷將軍，率新城侯張輔、西平侯沐晟等二十五將軍出廣西、雲南兩道討之。能至龍州卒，輔代總其衆。五年平安

南，俘護季聲父子。詔求陳氏後立之，無所得，因置交趾等處承宣布政使司，領府十七，州五，屬府州四十二，縣一百五十七。又置衛十一，所十三，屬都指使司。又置市舶司一。其地東西相距一千七百六十里，南北二千八百里。六年，交人簡定復推陳季擴爲亂，命沐晟討之，敗績。復命張輔往征，擒定。季擴尋請降，以爲交趾右布政使。未幾復叛。十年，輔等以計擒之，賊黨皆平。十五年，召輔還都。明年，寇孽黎利復叛，官軍屢討。宣德初，再遣大兵征之，皆敗績，賊勢益張，侵吾、祿、州、西平、州及欽、州四峒，皆陷。既而利托言請立陳氏後，罷兵息民。朝廷因而許之，遂棄交趾。六年，詔利權署安南國事。八年，利死，子麟嗣。正統元年，封爲安南國王。七年，麟死，子濬立，遣兵攻占城，虜其王摩訶賁該以歸。天順三年，濬爲庶兄宜民所弑。四年，濬弟灝嗣，輒侵吾土地，攻殺老撾宣慰司刁拔雅、蘭、掌父子，爲八百敗歸，屢攻占城，謀并其國。弘治十年，灝死，子暉嗣。十七年，暉死，子敬嗣。旋死，以弟誼嗣。正德初，其臣阮种弑之，立其弟阮伯勝。國人共殺种等而立灝庶子暉。暉廢，政在羣下，國亂。正德十一年，其下陳嵩弑暉自立，舊目莫、登、庸等復逐嵩立暉兄子諱，專其國。嵩奔據諒山。黎氏舊臣鄭綬以登、庸不臣漸著，推族子四榜爲主，登、庸皆攻殺之。十六年，登、庸攻嵩，嵩敗死。嘉靖初，登、庸自稱安、興王，謀弑諱。諱奔清、化，登、庸立其庶弟應。交人云：「應，登、庸子也。」六年，登、庸竊安、南，尋殺應。九年，禪位於其子方、瀛，自稱太、上皇，退居都、齊、海、陽，爲方、瀛外援。諱竟死清、化，故臣共立諱子寧，居來、州、漆、馬、江，倚老撾爲援。十五年，寧遣其臣鄭、維、僚來乞師，詔咸、寧、侯、仇、鸞爲帥。尋以征、蠻將軍安、遠、侯、柳、珣代之，而命樞臣毛、伯、溫總其事。伯、溫駐師南、寧，時方、瀛死，子福、海嗣。登、庸聞大軍致討，懼請歸欽、州二都、四峒故侵地，世奉職貢。乃於鎮、南、關受登、庸降，廢勿、王，降國爲都統司，十三路爲宣撫司，以登、庸

爲都統司，統境內十三宣撫司，隸廣西藩司。而命黎寧仍居漆馬江，令雲南守臣勘訪，果繫黎氏後，始授境土制下。登庸已死，乃授其孫福海。二十五年福海死，子宏漢幼，阮如桂等擁衛之，三十年始嗣職。時國內多艱，貢不達，黎氏雖據一隅，黨類強。寧死，鄭檢立寧子龍。龍死，復立其宗人黎維邦。會莫氏臣黎伯驪作亂，鄭檢以兵會之，宏漢奔海陽，自是益衰弱。四十三年宏漢卒，萬曆初子茂治襲爲都統使，國大亂。既而黎維邦死，鄭檢子松復立維邦子維潭，舉兵攻殺莫茂治，盡逐莫氏遺孽。茂治子敬用竄居高平府，敬璋、敬恭竄居東海府保樂州，復內相讐。未幾敬璋爲黎氏所殺，維潭遣使浮海，詣督臣歸罪，請款關輸貢。因與約，必以高平居莫氏，如黎氏漆馬江故事。維潭意以高平其故地也，莫氏篡臣，不宜以漆馬江爲比。久之，乃聽。二十四年受維潭降，以爲都統使。與莫敬用以高平，令維潭毋侵害，於是安南復定。自黎氏以來，雖奉貢稱藩，然自帝其國如故矣。○羅氏曰：「入交之道凡三：一由廣西，一由廣東，一由雲南。由廣東則用水軍，伏波以來皆行之。廣西道宋行之。雲南道元及明朝始開。廣西道亦分爲三：從憑祥州入者由州南關隘一日至交之文淵州坡壘驛，復經脫朗州北，一日至諒山衛，又一日至温州之北，險徑半日至鬼門關，又一日經温州之南新麗村，經二卜江，一日至保祿縣，半日渡昌江，又一日至安越縣南市橋江下流。北岸一道，由思明府入，過摩天嶺，一日至思陵州，過辨強隘，一日至祿平州，州西有路一日半至諒山府。若從東南行過車里江，此江乃永樂中黎季犛堰之以拒王師，後偵知其堰處，乃決之以濟師，一日半至安博州，又一日半過耗軍峒，山路險惡，又一日至鳳眼縣，又分二道：一道一日至保祿縣，亦渡昌江；一道入諒江府，亦一日至安越縣之南市橋江北岸，各與前道會。其自龍州入者，一日至平而隘，又一日至七源州，二日至文蘭州平茄

社，又分爲二道：一道從文蘭州，一日經右隴縣北山徑出鬼門關，平地四十里，渡昌江上源，經右隴之南，沿江南岸而下，一日至世安縣，平地至安勇縣，又一日亦至安越縣之中市江北岸；一道從平茄社西，一日半經武崖州，山徑二日至思農縣，平地又一日半亦進至安越縣之北市橋江上流北岸，市橋江在安越縣境中昌江之南，諸路總會之處，隨處皆可濟師，一日至慈山府，又至東岸嘉林等縣，渡富良江以入交州。雲南亦有二道。其一道由臨安府蒙自縣經蓮花灘入交州之石隴關，下程瀾峒，循洮江源右岸，四日至水尾州，又八日至文盤州，又五日至鎮安縣，又五日至下華縣，又三日至清波縣，又三日至臨洮府。洮水即富良江上流，其北爲宣光江，南爲陀江，所謂三江者也。臨洮二日至山園縣，又二日至興化府，即古多邦城，自興化一日至白鶴神廟三岐山，又四日至白鶴縣，渡富良江。其一道自蒙自縣河陽隘，循洮江左岸，十日至平源州，又五日至福安縣，又一日至宣江府，又二日至端雄府，又五日亦至白鶴三岐江，然皆山徑，欹側難行。其循洮江右岸入者，地勢平夷，乃大道也。若廣東海道，自廉州烏雷山發舟，北風順利，一二日可抵交之海東府。若沿海岸以行，則烏雷山一日至永安州白龍尾，白龍尾二日至玉山門，又一日至萬寧州，萬寧一日至廟山，廟山一日至屯卒巡司，又二日至海東府，海東二日至經熟社，有石隄，陳氏所築以禦元兵者，又一日至白藤海口，過天寮巡司南至安陽海口，又南至塗山海口，又南至多漁海口，各有支港以入交州。自白藤而入則經水棠、東潮二縣至海陽府，復經至靈縣，過黃徑、平灘等江。其自安陽海口而入則經安陽縣至荊門府，亦至黃徑等江，由南策，上洪之北境以入。其自塗山而入，則取古齊，又取宜陽縣，經安老縣之北至平河縣，經南策、上洪之南境以入。其自多漁海口而入，則由安老、新明二縣至四岐，遡洪江至快州，經鹹子關以入。多漁南爲

太平海口，其路由太平、新興二府，亦經快州賊子關口，由富良江以入。此海道之大略也。交州之東有海陽、荊門、南策、上洪、下洪、順安、快州等府，去海不遠，各有支港，穿達迤邐數百里，大艦不能入，故交人多平底淺舟，以便入港云。山居贊論曰：「安南自秦、漢以來入中國版圖者，歷千百年，其比於外臣，特自宋以後耳。宋之兵力自太宗以後勢已衰鈍，其不能奄有交南宜也。元人兵威所加，輒見摧滅，而安南竟偃蹇一隅，不能郡縣其地，何哉？倘所謂強弩之末，不能穿魯縞者歟？永樂中兩興大役，皆係累其君長，掃清其境土，而師還未幾，反覆隨之，豈時有難易，交人方強，未可逆折歟？逮正德以後陳氏、莫氏與黎氏揭亂相尋，兵分勢削，取亂侮亡，機不可失，而豎子帥師，徒費張皇。其後任交人之自爲魚肉，以秦、越相視而已矣。夫是非不張，恩威不振，何以歷蠻夷觀聽之情哉？」國史：「嘉靖十六年仇鸞爲帥，尚書毛伯溫督師駐廣西，檄諸路兵候師期。正兵分三哨，廣西憑祥州爲中哨，龍州羅迴峒爲左哨，思明府思州爲右哨。分奇兵爲二哨，歸順州爲一哨，廣東欽州爲一哨。又烏雷山等處爲海哨。又雲南兵於蓮花灘分三哨，東西並舉，馳驛安南，莫登庸大懼乞降。」蓋先是撫臣蔡經言安南水陸之路有六，憑祥、龍州、歸順、欽州、海陽、西路，皆接安南也。時欽州知州林希元言：「莫氏所恃者惟都齋耳。其地濱海，淤塗十餘里，舟不得泊，計以爲王城不支即守都齋，都齋不支即奔海上耳。若以東莞、瓊海之師助占城擊其南，賊不得奔矣。以福建之師航海出枝封河，湖廣之師出欽州與合，都齋無巢穴矣。以廣西之師出憑祥、雲、貴之師出蒙自，以攻龍編，則根本拔矣。如此可一舉定也。」其說置不問。夫攻安南者，希元之言非勝算哉？又安南僭置僞東都，設五府、五部、六寺、御史臺、通政司，五十六衛，四城兵馬等衙門。附郭府三，一曰奉天，二曰廣德，三曰永昌。永樂二年改東都

爲交州府。宣德二年棄交趾，黎氏復曰東都。其西都亦曰清華、承政，永樂二年改清化府。又都齋、古齋，近海口，莫登庸故鄉也。本無城郭，以鐵笏木作排棚三層爲外衛，登庸所自居也。大約自黎氏以來，鄭氏、莫氏二宗最強，而鄭以江華爲重，莫以古齋爲重云。二都之外，分道十三，設承政司、宣察司、總兵使司，亦仿中國三司之制。

交州府，即安南之東都也。永樂二年改置。領州五，曰慈廉、福安、威蠻、利仁、三帶；領縣十三，曰東關、慈廉、石室、英南、清潭、清威、應平、平陸、利仁、安朗、安樂、扶寧、立石。宣德二年以後仍爲東都，領附郭府三，曰奉天、廣德、永昌。又分置安邦承政司，領府一，曰海東。

龍編城，在今交州府東。漢郡治也。漢志：「交趾郡治羸陵。」後漢治龍編，孫吳黃武六年交州亦自番禺縣徙治焉，晉、宋以後因之。水經注：「漢建安二十三年立城之始，有蛟龍盤編於水南北二津，因改龍淵曰龍編。」或疑縣本名龍淵，唐顏師古、章懷太子諱淵，改漢志爲編也。隋開皇中仍爲交趾。大業中移交趾郡治宋平，而龍編爲屬縣。唐武德四年置龍州，又析置武寧、平樂二縣。貞觀初州廢，以二縣省入龍編，隸仙州。十年州廢，仍屬交州。今偶奉天府或曰即龍編也。

交趾城，在府西。劉昫曰「漢交趾郡治羸陵」，即此。羸，孟康音蓮，陵，音受，土簍也。後漢仍爲羸陵縣，屬交趾郡，晉、宋因之。隋改置交趾縣，屬交州。唐武德四年仍置交州於此。又析置慈廉、烏延、武立三縣，以慈廉水爲名，置慈州。六年改爲南慈州。貞觀初州廢，三縣仍省入交趾。二年移縣治於漢之故交趾城，仍爲交州治。寶曆元年徙州治於宋平，縣屬焉。顏師古曰：「羸陵亦讀曰累纒。」杜佑曰：「交趾之名，以南方夷人其足大趾開廣，並

足而立，其趾則交，故名。」

宋平城，在府南。漢龍編縣地，宋孝建初析置宋平縣，尋又置宋平郡治焉。梁、陳因之。隋平陳郡廢，縣屬交州。大業初爲交趾郡治。唐武德五年於縣置宋州，并置弘義等縣，又析置懷德等縣。六年改曰南宋州。貞觀初州廢，以弘義、懷德二縣省入，屬交州。大曆中爲交州治，後移於今所。○南定城，在府東北。本宋平縣地，唐武德四年析置南定縣，屬宋州。明年改屬交州。大曆五年廢，貞元八年復置。〔三〕咸通六年高駢爲安南都護，自海門進兵至南定，掩擊峰州蠻衆，大破之，即此。

朱載城，在府東南。漢縣，屬交趾郡，後漢因之。晉仍屬交趾郡，宋、齊因之。梁大同末詔楊曠討交州賊李賁，曠以陳霸先爲先鋒，出交州，敗賁於朱載，又敗之於蘇歷江口。五代志：「朱載縣，梁置武平郡，隋平陳郡廢，縣仍屬交州。」唐武德四年置戴州，并置高陵、定陵二縣屬焉。貞觀初州廢，以二縣省入朱載，屬交州。戴同焉。劉昫曰：「朱載，孫吳時軍平縣地，晉武帝曰海安。」未知所據。

勾漏城，在府西南。漢置苟漏縣，屬交趾郡。苟漏與勾漏同。後漢亦曰苟漏縣。〔四〕晉仍屬交趾郡，葛洪求爲苟漏令，即此縣也。宋、齊以後因之，隋縣廢。今石室縣是其地也。

平道城，在府西北。今安朗縣地，後漢建武十九年馬援平交趾蠻置封谿縣，屬交趾郡。三國吳屬武平郡，晉因之。宋仍屬武平郡。齊析置平道縣，梁、陳間以封谿省入平道。劉昫曰：「封谿即古駱越地也。」南越志：「交趾之地，最爲膏腴，舊有君長曰雒王，其佐曰雒侯，其田曰雒田，民墾食之，因曰雒民。」交州志：「雒王、雒侯主諸郡縣，縣有

雒將，後漢建武十五年交趾薨，冷雒將女子徵側、徵貳反，九真、日南、合浦蠻俚皆應之。」廣州記：「交趾有雒田，仰潮水上下，人食其田，名爲雒侯。後蜀王子將兵攻取其地，自稱安陽王。後南越王尉陀復奪取之。今平道城東有城凡九重，周九里，蓋即安陽王所居城矣。」或以爲封谿故城也。隋志：「平道縣舊曰國昌，開皇十二年改平道縣，屬交州。」五代志南齊有昌國縣，屬宋平郡，蓋即國昌之訛。梁、陳間又省平道入國昌，隋復故國昌爲平道也。唐武德四年於平道置道州，又析置昌國、武平二縣，六年改爲南道州，是年又更名仙州。貞觀十年州廢，又以昌國省入平道，隸交州。志云：府西有望海廢縣，亦後漢建武中與封谿縣同置，後廢。相近又有蠻城，祝穆云：「亦馬援所築戍守處也。」

太平城，在府西北。本封谿縣地，吳孫皓建衡三年討扶巖夷，以其地置武平郡，治武寧縣。晉因之，宋改縣曰武定，仍爲武平郡治。齊仍舊。隋平陳郡廢，縣屬交州。開皇十八年改曰隆平縣。唐武德四年置隆州，并置義廉、封谿二縣，尋徙州治義廉。六年曰南隆州。貞觀元年州廢，省義廉，以封谿隸岑州，隆平隸交州。「五」先天元年改曰太平縣，仍屬交州。○武平城，亦在縣西北。亦封谿地，唐武德四年析平道縣置武平縣，屬道州，明年改屬交州。劉昫曰：「唐初改隋隆平縣爲武平。」似誤。

笏竹城，或曰即今府城。唐大中十二年王式爲安南都護經略使，至交趾，樹笏木爲柵，可支數十年。深塹其外，泄城中水，塹外植竹，寇不能冒。范成大桂海虞衡志：「新州有笏竹城，交趾外城亦是此竹，即式所植者。」又大羅城，志云：在府城外。舊城唐刺史張伯儀所築，本在江南，寶曆元年安南都護李元善請移城於江北岸，未幾復故。咸

通七年靜海節度高駢築安南城，周三千步。又鑿道三所，〔六〕通使者道，名曰天威道。今故址猶有存者。○東關城，在府城北，五代以後蠻所改置附郭縣也。〔元至正二十五年〕脫歡入交趾，安南王陳日昺遁據海口。既而擁兵守禦東關，遏絕歸路，脫歡戰敗，由間道遁還。明朝宣德初黎利叛，率賊衆圍東關，大帥王通懼，謀以交趾歸利，檄軍民官吏出城赴東關，即此。

三帶城，在府西富良江北岸，蠻所置三帶州也。永樂初張輔等討交趾，自新福縣移營三帶州招市江口，造船圖進取是也。○清威府，在城西南百五十里，又西南五十里有石室城，皆蠻所置縣也。宣德初黎利作亂，其弟善據廣威州，擁衆攻交趾，參將馬瑛大破之於清威，與王通合兵石室縣，進屯寧橋。陳治以爲宜置師於石室縣之沙河以覘賊勢，不聽，遂渡河而陳，地皆險惡，伏起大敗。黎利自義安來合圍東關，攻交趾城，敗去。

佛跡山，在府西南石室縣。山下有池，景物清麗，爲一方勝概。又勾漏山，亦在石室縣，相傳漢句漏縣置於其下。

海，在府東南。自廣東欽州而西南，歷烏雷山以至南境之大長海口，其可入之支港以數十計。馬援討徵側緣海而進，高駢復安南亦自海道而前。今有天威涇，駢所鑿也。〔唐史：〕咸通二年南詔攻安南，都護蔡襲請救。詔襲按軍海門。襲以圍迫不及奉詔，城陷死之。其僚屬樊綽走渡江，督荆南兵入東鄂，苦戰，頗有斬獲。是夜南詔屠安南，尋詔大興諸道兵進，因置行交州於海門，調山東之兵戍守，命容管經略使張茵鎮之，經略安南。茵逗留不進，乃以高駢爲大帥，仍駐海門。七年駢收復安南，以交州至邕州海道多潛石，漕運不通，遂鑿石開道。有青石徑，相傳馬援所不能治，既而震碎其石，亦得通，因名天威涇。自是漕運無滯。〔海門，今見梧州府博白縣。〕

富良江，在府北三十里。其上源即雲南之瀾滄江也。自車里宣慰司東北界及臨安府之西南界流入境，曰蓮花灘，東流歷文盤州、臨洮府北境，亦曰洮江；又東至興化府境，合于江北之白鶴江，江南岸又有沱江來注之，謂之三岐江；又東歷三帶州南，至府城之北東南流，歷順安、上洪、下洪諸府之境，縱橫貫串，以達於海。宋熙寧八年，交趾分道入寇，欽、廉、邕皆陷，郭達討之，行至長沙，先遣將復邕、廉，而自將西進至富良江。交人乘船逆戰，大敗其軍。其王李乾德請降，於是取廣源等州而還。寶祐五年，蒙古兀良兀台入交趾，至洮江，交人戰敗，其王陳日煊走海島。元至元二十一年，脫歡擊安南王陳日烜，敗其兵於富良江，日烜遁，遂入其都城，以盛夏霖潦，軍中疫作引還。二十四年，脫歡等復渡富良江，次交趾城下，敗其守兵，日烜復遁據海口。明朝永樂五年，張輔等討安南，從憑祥入，進次昌江市，造浮橋濟師，前鋒直抵富良江。而沐晟亦自雲南蒙自入安南，駐兵洮江北岸，造舟徑渡，至白鶴江遣人來會。賊恃東、西都及宣江、洮江、沱江、富良江爲固，於江北岸緣江樹柵，多邦隘增築土城，城柵相連至九百餘里。又於富良江南岸環江置柵，盡取國中船艦列江內。諸江海口俱下柵木以防攻擊。賊之東都亦嚴固。繼而輔等合軍拔多邦，遣別將向其西都，賊焚官室遁入海。既又敗賊於富良江，遂盡平其地。一統志：「富良江一名瀘江，上接三帶州白鶴江，經交州府城東下，通行四十四里至歸化江。」海南使錄云：「富良江行四十四里至歸化江，一名瀘江，闊與漠鄂等江相似。自大理西下東南入於海，有四津，潮汐不常。」或曰歸化江即富良江下流矣。

來蘇江，在府城東北。自富良江分流，轉而西，直抵銳江。本名蘇歷江，相傳昔有蘇歷者開此江，因名。梁大同末，陳霸先敗李賁於蘇歷江，既而進克嘉寧諸軍，皆屯於江口。胡氏曰：「江口，蘇歷江入海之口也。」永樂初黃福爲交

趾布政司，以江淤重濬，時王師弔伐，因更今名。○武定江，在府北二百五十里武平縣界，下流入於富良江。

喝門江，在府西南。又府西有生厥河。永樂二年交趾簡定反，沐晟討之，戰於生厥河，敗績。既而詔張輔進討，輔進兵慈廉州，攻喝門江粉社營棚皆破之，獲定。

浪泊，東關縣西北。一名西湖。後漢建武十八年馬援由海道討徵側，隨山刊道千餘里，至浪泊上。賊既平，謂官屬曰：「吾在浪泊、西里間，賊未滅時，上潦下霧，毒氣熏蒸，仰視飛鳶，跼跼墮水中。」謂此也。酈道元曰：「葉榆水過交趾麓冷縣北，分爲五水，絡交趾郡中。其南水自麓冷縣東經封谿縣北，又東經浪泊。馬援以其地高，自西里進屯焉。」郡國志：「浪泊在交趾封谿縣界，援既平交趾，奏分西里置封谿、望海二縣。」

石碣鎮，在府東南。晉義熙七年盧循自合浦犯交州，刺史杜慧度拒之，破於石碣。胡氏曰：「岸曲曰碣。」〔七〕既又破循於龍編南津，循自投於水，取其尸斬之。

寧橋。在府西，近石室縣。宣德元年命成山侯王通等征交趾，至寧橋，遇伏軍敗處也。○東津渡，在東關縣，即富良江渡口也。舊以舟楫往來阻於風濤，永樂初張輔、沐晟始置浮橋，一歲一易。

北江府，在交州府北二百里。永樂二年改置。領州三，曰嘉林、武寧、北江；領縣七，曰嘉林、超類、細江、善才、東岸、慈山、善督。宣德以後仍以北江及諒江地置京北承政司。〔八〕領府四，曰北河、慈山、諒江、任安。

越王城，在府西南東岸縣。一名螺城，以其屈曲如螺也。南越志：「交趾之地，初無郡縣，統其民者爲雒王，副爲雒侯，亦曰雒將，皆銅印青綬。傳十八世蜀王子伴擊滅之，代有其地，爲安陽王。其後南越擊并之。」或以爲此即安

陽城，與交州府平道縣接界。隋仁壽二年交州俚帥李佛子作亂，據越王故城，遣其兄子大權據龍編城，其別將李普鼎據烏延城，劉方討平之。烏延城或曰舊在府北境，蓋近烏澍之地。舊志：越王城中有故宮遺址。一統志：「交州府三帶州故有雉王宮。」

嘉林城，在府西南，即今州城也。濱富良江。唐繼廉都金州所領有嘉陵縣，疑即此。蠻曰嘉林，置州。永樂初張輔等進屯三帶州，驍騎朱榮敗賊於嘉林江，即其地也。江因城而名。

東究山，〔九〕在嘉林州。一名東翠山，唐高駢建塔其上。又仙遊山，在武寧州。一名爛柯山。州境又有金牛山，相傳高駢欲鑿此山，見金牛奔出而止。或以爲漢居風縣地，恐悞。

赤土山，在府西善督縣境。萬仞插天，亘數百里。志云：安南西面皆山，而寄狼、寶臺、佛跡、馬鞍在境內，皆高峻，其傑出者則赤土山也。

天德江，在府東，下流注富良江。一名廷蘊江，又名東岸江。永樂初黎寇懼討，役民堙塞江口，寇既平，重加濬治，舟楫復通。

市橋江。在府西，東南流入富良江。自廣西入安南者，江爲必由之道。或謂之乾滿江。元至元二十一年脫歡等擊安南王陳日煚，入其都城，師還，交人追襲，又邀擊別將唆都於乾滿江，唆都戰死，即此處也。一名南棚江。志云：道出南棚江，以筏渡行四十里至富良江。水湍急，不甚闊。江之南名橋市，居民頗衆云。

諒江府，在交州府東北三百三十里。永樂二年改置。領州二，曰諒江、上洪；領縣十，曰清遠、那岸、平河、鳳山、陸那、

安寧、保祿、古蘭、唐安、多錦。宣德以後仍分屬京北、山南二承政司。

崑山，在府東鳳山縣境，巖洞殊勝。

昌江。府南七十里，保祿縣南。源出府西北山中，下流合市橋江。有昌江市，永樂初討安南，張輔等進次昌江市，造

浮橋濟師是也。宣德黎利陷昌江城，敗官兵，遂攻交趾城。既而都督崔聚率官軍討黎利，進至昌江，復爲賊所敗。

諒山府，在交州府北五百三十里。永樂二年改置。領州七，曰上文、下文、七源、萬涯、廣源、上思、下思；領縣五，曰

丘溫、鎮夷、淵縣、丹巴、脫縣。宣德以後仍以諒山地置諒山承政司，領府一，曰諒山。

廣源城，在府西北境，與廣西龍州接界。或曰唐所置羈縻平源州也。本都金州之平原館，開成四年析置州，領

龍石、平林、龍當等縣，屬安南都護。宋爲羈縻廣源州，屬邕州都督府。宋史：「廣源州在邕管西南鬱江之南，崖險

峭深。儂智高爲州蠻作亂，據倘猶州，又襲據安德州，交趾不能討，因昇以廣源，使知州事。智高僭稱南天國，緣鬱

江東下，破宋邕州。倘猶、安德，舊俱與廣源接界也。又熙寧八年交趾入寇，詔郭達討之。達遣別將燕達掠廣源

州，舉兵出界，直抵富良江。未至交州三十里，其王李乾德懼，乞修貢如初，遂收廣源州、門州、思浪州、蘇茂州、枕

榔州而還。詔以廣源爲順州。後沒於蠻，仍曰廣源。」

丘溫城，府北二百里，即今縣。舊屬廣西思明府。洪武二十九年思明府奏安南奪丘溫、如整、慶遠、淵、脫等縣，詔

以其地還思明，不奉命，自是沒於蠻。永樂初遣征安將軍黃中等送陳天平歸國，至丘溫，爲黎賊所給，進至芹站，天

平見殺，即此。

湯州城，在府東。唐置州，治湯泉縣，兼領綠水、羅韶二縣。天寶初曰湯泉郡，乾元初復曰湯州，後廢。又古州，城，〔一〕舊志云：在府東北。唐貞觀十二年置古州，治樂古縣，兼領古書、樂興二縣。天寶初曰樂古郡，乾元初復故。杜佑曰「州接濃州界」，蓋皆與邕州相近。又廢武州，在府北境。新唐書邕管所領有顯州、武州、沈州，後省。或曰武州大中間復置。唐史：「咸通初南詔陷交趾，安南都護李鄆奔武州。二年鄆自武州收集土軍攻羣蠻，復取安南是也。」○廢羅伏州，在府西境。本唐屬廉州，咸通七年南詔據安南，置扶邪都統。實錄：「扶邪縣屬羅伏州，南詔置。」

廢安州，在府北境，接廣西太平田州界。宋大觀二年知桂州張莊奏安化、上三州一鎮諸蠻納土，幅員九千餘里。又奏寬樂州、安沙州、譜州、泗州、七源等州納土，計一十六州，三十三縣，五十餘峒，幅員萬里。大抵皆安南接邕管之地，莊夸言之也。

丘蟠山，在府東南丹巴縣境。上有石門，廣三丈，相傳馬援所鑿。又府西南有奇狼山，尤高峻。○雷火峒，在府西北。宋嘉祐二年雷火峒蠻僂宗旦入寇邕州，即此。又宋史：「僂智高年十三，殺其父奔雷火峒。」峒蓋在廣源，倘猶二州間。

阿勞江，在府東。劉昫曰：「阿勞江口南至交州城五百四十九里。」下流入海。○下梢河，在府境。宣德二年黎利敗王師，陷隘留關，鎮夷將軍王通守交趾，懼，出下梢河，立壇與利盟約而還。

隘留關，在府北文淵州界，又南爲鷄陵關，又南爲芹站。永樂二年遣黃中等送陳天平還安南，至丘溫，又進度隘留，